



Sommaire

- Ouverture de la séance publique
 - M. Fernand Etgen, Président
- Hommage aux victimes d'une explosion au dépôt de munitions du camp militaire à Waldhof
 - M. Fernand Etgen, Président
- 7333 - Projet de loi portant approbation de la Convention multilatérale pour la mise en œuvre des mesures relatives aux conventions fiscales pour prévenir l'érosion de la base d'imposition et le transfert de bénéfices, signée à Paris, le 7 juin 2017
 - Rapport de la Commission des Finances et du Budget : Mme Joëlle Elvinger
 - Discussion générale : M. Laurent Mosar (intervention de M. Guy Arendt) - M. Franz Fayot - Mme Josée Lorsché - M. Roy Reding - M. David Wagner (intervention de M. Roy Reding) - M. Sven Clement
 - Prise de position du Gouvernement : M. Pierre Gramegna, Ministre des Finances (intervention de M. Laurent Mosar)
 - Vote sur l'ensemble du projet de loi et dispense du second vote constitutionnel
- 7363 - Projet de loi portant modification de la loi modifiée du 1^{er} août 2001 concernant la circulation de titres
 - Rapport de la Commission des Finances et du Budget : M. André Bauler
 - Discussion générale : M. Laurent Mosar - M. Franz Fayot - M. Henri Kox (intervention de M. Roberto Traversini) - M. Roy Reding - M. David Wagner - M. Sven Clement
 - Prise de position du Gouvernement : M. Pierre Gramegna, Ministre des Finances
 - Vote sur l'ensemble du projet de loi et dispense du second vote constitutionnel
- 7223 - Projet de loi portant modification de la loi du 25 novembre 2014 prévoyant la procédure applicable à l'échange de renseignements sur demande en matière fiscale
 - Rapport de la Commission des Finances et du Budget : Mme Joëlle Elvinger
 - Discussion générale : M. Laurent Mosar (interventions de M. André Bauler et Mme Josée Lorsché) - M. Franz Fayot (intervention de M. Laurent Mosar) - M. Henri Kox - M. Roy Reding - M. David Wagner - M. Sven Clement
 - Prise de position du Gouvernement : M. Pierre Gramegna, Ministre des Finances (interventions de M. Gilles Roth et M. Laurent Mosar)
- 7288 - Projet de loi portant modification de la loi modifiée du 28 juin 1976 portant réglementation de la pêche dans les eaux intérieures
 - Parole après ministre : M. Laurent Mosar - M. Pierre Gramegna, Ministre des Finances - M. Gilles Roth - M. Pierre Gramegna, Ministre des Finances
 - Vote sur l'ensemble du projet de loi et dispense du second vote constitutionnel
- 7368 - Projet de loi portant approbation des amendements au Protocole de 1999 à la Convention sur la pollution atmosphérique transfrontière à longue distance, relatif à la réduction de l'acidification, de l'eutrophisation et de l'ozone troposphérique, à ses annexes II à IX et portant ajout de nouvelles annexes X et XI, adoptés par la décision 2012/2 du 4 mai 2012 prise à Genève lors de la 30^e session de l'organe exécutif de la Convention de 1979 sur la pollution atmosphérique transfrontière à longue distance
 - Rapport de la Commission de l'Environnement, du Climat, de l'Énergie et de l'Aménagement du territoire : M. François Benoy
 - Discussion générale : M. Paul Galles - M. Max Hahn - M. Georges Engel - M. Fernand Kartheiser - M. David Wagner - M. Marc Goergen - M. Henri Kox
 - Prise de position du Gouvernement : Mme Carole Dieschbourg, Ministre de l'Environnement, du Climat et du Développement durable (intervention de M. Fernand Kartheiser)
 - Parole après ministre : M. Paul Galles - Mme Carole Dieschbourg, Ministre de l'Environnement, du Climat et du Développement durable - M. Gilles Roth - Mme Carole Dieschbourg, Ministre de l'Environnement, du Climat et du Développement durable (interventions de M. Fernand Kartheiser et M. Gast Gibéryen) - M. Fernand Kartheiser - Mme Carole Dieschbourg, Ministre de l'Environnement, du Climat et du Développement durable
 - Vote sur l'ensemble du projet de loi et dispense du second vote constitutionnel

Au banc du Gouvernement se trouvent : M. Pierre Gramegna et Mme Carole Dieschbourg, Ministres.

(La séance publique est ouverte à 14.02 heures.)

1. Ouverture de la séance publique

► **M. Fernand Etgen, Président.**- Ech maa-chen d'Sitzung op.

2. Hommage aux victimes d'une explosion au dépôt de munitions du camp militaire à Waldhof

Léif Kolleeginnen a Kolleegen, mir hunn alleguer haut de Moie mat Bestierzen d'Nouvelle vun der Explosioun am Munitionsdepôt vun der Arméi um Waldhaff héieren. Den Informatiounen no, déi eis virleien, hätten zwee Leit hiert Liewe gelooss am Dénsgscht vum Land an zwee Leit wäre blesséiert, woubäi ee méi schwéier.

Am Numm vun der ganzer Chamber wéilt ech deene Familljen, déi bei dësem trageschen Ongléck ee Familljemember verluer hunn, eist déifste Matgefill ausdrécken. Deenen zwee Verwonnte wënsche mir vun hei aus alles erdenklech Guddes, fir datt si sech erëm séier vun hire Blessuren erhuelen. Eis Gedanke sinn op jidde Fall bei deene Betraffenen an hire Familljen.

3. 7333 - Projet de loi portant approbation de la Convention multilatérale pour la mise en œuvre des mesures relatives aux conventions fiscales pour prévenir l'érosion de la base d'imposition et le transfert de bénéfices, signée à Paris, le 7 juin 2017

Eisen éischte Punkt vun eisem Ordre du jour vun haut de Mëtten ass de Projet de loi 7333, eng multilateral Konventioun am fiskale Beräich. D'Riedezäit ass nom Basismodell festgeluecht an et hu sech schonn ageschriwwen: den Här Laurent Mosar, den Här Franz Fayot, d'Madamm Josée Lorsché, den Här Roy Reding an den Här David Wagner.

D'Wuert huet elo d'Rapportrice vum Projet de loi, déi honorabel Madamm Joëlle Elvinger. Madamm Elvinger, Dir hutt d'Wuert.

Rapport de la Commission des Finances et du Budget

► **Mme Joëlle Elvinger (DP), rapportrice.** Merci, Här President. Léif Kolleeginnen a Kolleegen, de Projet de loi 7333 iwwert déi multilateral Konventioun zur Émsetzung vun de Mesurë géint d'Érosion de base an den Transfer vu Benefisser am Kader vu bilaterale Steierkonventiounen, dee mir haut stëmmen, schreift sech an an eng ganz Rei aner Gesetzesprojeten zur Fiskalitéit, déi mir iwwert déi lescht Joren a Méint op dëser Plaz diskutéiert a gestëmmt hunn.

Am Kader vum sougenannte BEPS-Aktiounspiang vun der OECD si jo bekanntlech 15 Rapporten zu 15 ënnerschiddlechen Aktiounen elaboréiert gi mat konkrete Mesurë fir eng méi gerechte Steierlandschaft op internationalem Niveau a mam Zil, gewësse Steieroptimisatiounspraktike vu groussen transnationale Firmen ze ënnerbannen. Vun dëse 15 Aktiounen bezéie sech der 5 direkt op d'Duebelbesteierungsofkommessen tëschent zwee Staaten. Verschidden Dispositiounen vun dëse Konventiounen hunn et bis elo a verschiddene Fäll erméiglecht, dass Contribuabelen, déi an zwee Länner aktiv sinn, am Endeffekt a kengem vun deenen zwee Länner Steiere bezuelt hunn oder manner Steieren, wéi si missten. Am Kader vum BEPS-Aktiounspiang sinn dës Schlupflächer identifizéiert ginn an et goufe geziilt Mesurë proposéiert, fir se zouzemaachen.

Esou geet et bei der Aktioun 2 drëm, d'Effekter vun de sougenannten hybriden Dispositiver ze neutraliséieren. D'Aktioun 6 gesäit vir, den iwwerméisseg Gebrauch vun dëse Konventiounen ze verhënneren, wann et net ubruecht ass, während d'Aktioun 7 Mesurë proposéiert, fir ze evitéieren, dass Entreprisen op kënschtlech Manéier de Statut vum Établissement stable ëmginn.

D'Aktioun 14 soll d'Effikassitéit vun de Mechanismen, fir Konflikter ze léisen, erhéijen an d'Aktioun 15 schliisslech gesäit e multilateraalt Instrument vir, fir dës verschidde Mesuren an de Steierkonventiounen ze implementéieren.

Déi multilateral Konventioun ass domadder en eenzegaartegt Instrument, dat et erlaabt, mat engem eenzegem Text alleguer déi aktuell bilaterale Konventiounen ze modifiéieren an déi genannte Mesuren ëmsetzen. Op déi Manéier muss een net all fiskal Konventioun, déi Lëtzebuerg mat engem anere Land ënnerschriwwen huet - dat wieren der aktuell 83 -, nei verhandelen an all Kéiers separat stëmmen.

Vun engem juristesche Standpunkt aus kann een och nach präziséieren, dass dës multilateral Konventioun net wéi e Protokoll, deen all déi

eenzel Konventiounen modifizéiert, funktionéiert, mä zesumme mat de jeeeweilege Konventiounen a Kraaft ass a vill méi d'Applikatioun vun de bilaterale Konventiounen modifizéiert.

Wéi fonctionnéiert déi multilateral Konventioun vun engem inhaltleche Point de vue? D'Konventioun bitt de Parties signataires effektiv eng gewësse Flexibilitéit am Bezuch op déi ënnerschiddlech Dispositiounen. Esou kann all Land sech selwer eraussichen, op wéi eng bilateral Ofkommessen d'Konventioun sech bezéie soll. D'niicht hunn d'Länner de Choix, ob si eng minimal Norm applizéieren wëllen oder ob se méi wäit wëlle goen.

Et ginn och verschidde fakultativ Dispositiounen, bei deenen d'Länner vun der Méiglechkeet, dës net ze applizéieren, Gebrauch maache kënnen.

Zu gudder Lescht bitt d'Konventioun de Länner verschidden Optiounen un am Stil vun A, B oder C, fir e spezifesch Problem ze léisen. Et ass an deem Kontext nach ervirzehiewen, dass, wann e Land eng Reserv par rapport zu enger fakultativer Dispositioun ausschwätzt, da gëllt dës Reserv tëschent dem spezifesch Land an all deene Länner, déi déi multilateral Konventioun matënerschriwwen hunn.

D'Choix vu Lëtzebuerg bei den eenzelnen Optiounen reflektéieren eng Politik, déi am Zeeche vun der Virsiicht a vun der Kontinuitéit steet. Wat déi minimal obligatoresch Norm betrëfft, esou huet Lëtzebuerg sech fir déi entscheet, déi am beschte bei seng aktuell Approche a Bezuch op bilaterale Konventiounen passt. Par contre am Fall vun Dispositiounen, deenen hiren Impakt ongewëss ass, huet Lëtzebuerg eng Reserv formuléiert, fir déi net ze applizéieren. Gläichzäiteg ass awer eng maximalistesche Approche gewielt ginn am Bezuch op de Champ d'application am Sënn, dass bal allegueren déi bilaterale Konventiounen vu Lëtzebuerg vun dëser multilateraler Konventioun beträff sinn.

Här President, erlaabt mer nach, e puer Wieder zum Historique vun dëser multilateraler Konventioun an dem Gesetzesprojet, ëm deen et hei geet, ze soen. Lëtzebuerg huet d'Konventioun de 7. Juni 2017 zu Paräis ënnerschriwwen. Insgesamt si bis haut 87 Länner Parties signataires vun där Konventioun, wouvunner der 19 d'Konventioun och scho ratifizéiert hunn. Mat dësem Gesetzesprojet ass Lëtzebuerg also dat 20. Land, wat d'Konventioun an nationaalt Recht ëmsetzt.

De Gesetzesprojet ass den 3. Juli 2018 vum Ausseminister deposéiert ginn an de Statsrot huet a sengem Avis vum 13. November 2018 gréng Luucht fir de Projet ginn.

An der Sëtzung vun der Finanz- a Budgetskommissioun vum 29. Januar dëst Joer gouf ech als Rapportrice genannt an de schrëftleche Rapport ass an der Reunioun vum 8. Februar ugeholl ginn.

Dëst gesot, Här President, soen ech Merci fir d'Nolauschteren a ginn den Accord vun der DP-Fraktioun zu dësem Gesetzestext.

► **M. Fernand Etgen, Président.**- Merci villmoos, Madamm Elvinger. Als éischte Riedner ass den honorabelen Här Laurent Mosar agedroen. Här Mosar, Dir hutt d'Wuert.

Discussion générale

► **M. Laurent Mosar (CSV).**- Jo, Merci, Här President. Merci fir d'Alleréischte der Rapportrice, déi, wéi mir dat vun hir gewinnt sinn, en exzellente schrëftlechen an och mëndleche Rapport hei ofgeléiwert huet, deen eis am Detail déi verschidden Elementer vun där Convention multilatérale explizéiert huet. Mir bleift also dozou näischt méi bäizefügen, dat war méi wéi komplett.

Ech wollt awer vun der Geleeënheet profitéieren, Här President, trotzdem de Finanzminister ze froen, wéi mer elo an der Praxis virginn. D'Madamm Rapportrice huet zu Recht ënnerstrach, mir hunn am Moment 83 Netbestueblungs..., Netbesteierungsofkommessen duebel ... (veuillez lire: 83 Netduebelbesteierungsofkommessen), ...

(Hilarité)

► **M. Guy Arendt (DP).**- Et ass Valentinsdag.

► **M. Laurent Mosar (CSV).**- Et ass schwéier haut. Et ass schwéier haut.

... déi ofgeschloss sinn a wou d'Fro sech elo stellt, wéi mer do virufieren, well ech mengen, datt mer awer net derlaanschtkommen, déi nach eenzel erëm ze diskutéieren. Quitte datt der wahrscheinlech eng Rei sinn, wou mer net brauchen drunzegoen. Mä nach wäerten der awer eng Rei sinn, wou mer och Demandé kréien, fir déi frësch ze verhandelen. An do stellt sech dann einfach d'Fro, Här Finanzminister, wéi mer do virufieren.

An ech huelen dann och direkt en éischt Beispill, dat ass d'Duebelbesteierungsofkommess mat Frankräich. Do ass e Projet de loi de 4. Dezember deposéiert ginn. E schéngt nach net aviséiert ginn ze si vum Statsrot. An deem Duebelbesteierungsofkommess stelle sech awer eng ganz Rei vu konkrete Problemer, op déi mer natierlech aginn, wa mer dat Ofkommess dann och hei an der Chamber diskutéieren a ratifizéieren.



Ech wollt lech, Här Finanzminister, do awer scho sensibiliséieren, well do sinn notament substaanzéll Ënnerscheeder tëschent Frontalieren, déi a Frankräich wunnen, wat deenen hir Pensiousrechter ubelaangt, am Verglach mat Frontalieren, déi an Däitschland respektiv an der Belsch wunnen. Do kënnst och e ganz konkrete Problem, mat deem elo schonn déi franséischt Camionneure geplot sinn. Alles dat, wéi gesot, si Schwierigkeeten, déi sech aus deem doten Duebelbesteuerungsofkommes erginn.

An ech wollt vun der Geleeënheet profitéieren, Här President, de Minister och dorop unzeschwätzen. An ech wier frou, wann en eis vläicht do och déi eng oder aner Erklärung kéint driwwer ginn.

Merci.

► **M. Fernand Etgen, *Président***.- Merci villmools, Här Mosar. Nächsten ageschriwwene Riedner ass den Här Franz Fayot. Här Fayot, Dir hutt d'Wuert.

► **M. Franz Fayot (*LSAP*)**.- Merci, Här President. Dem Joëlle Elvinger e grouse Merci fir säi gudden mëndlechen a schrëftleche Rapport. Hatt huet, mengen ech, alles gesot zu deem Projet, wat ze soen ass. Mir als LSAP begrëssen natierlech d'Unhuele vun dëser Konventioun, déi an déi richteg Richtung geet. Dat ass erëm eng Kéier eng Mesure, déi de ganze Paquet BEPS zu Lëtzebuerg transposéiert mat all senger Mesuren, déi, mengen ech, gutt sinn: d'Zoumaache vun deene Schlupflächer iwwer Hybridprodukter, iwwert déi Steiere kënnen evitéiert ginn, eng Rei aner Mesuren, déi och, mengen ech, a Richtung gi vu méi Substanz vun den Entrepreneuren, wat alles am Sënn ass vu méi Steiergerechtheet.

An dofir kënnen mir als LSAP dee Projet hei matdroen. Voilà!

► **M. Fernand Etgen, *Président***.- Merci villmools, Här Fayot. Nächsten ageschriwwene Riedner ass d'Madamm Josée Lorsché. Madamm Lorsché, Dir hutt d'Wuert.

► **Mme Josée Lorsché (*déi gréng*)**.- Merci, Här President. Och déi gréng Fraktioun stëmmt natierlech dëse Projet de loi, well mer prinzipiell all Moosnam ënnerstëtzen, déi am Kader vum BEPS dann och decidéiert an ëmgesat gëtt. Et handelt sech jo ëm déi 15. Aktioun vun deem ganze Moosnamekatalog vun der OCDE, wou et drëms geet, d'Transpositioun vu bilaterale Konventiounen massiv ze vereinfachen - de Moment ass dee ganze Prozess immens komplex -, dann awer och d'Duebelbesteuerungsofkommes méi transparent a méi effikass auserichten an ebe grad ze verënnern, datt international Betriber weder an deem engen nach an deem anere Land Steiere bezuelen, déi se awer eigentlech de State misste bezuelen.

E wäert och e positiven Impakt op eise Budget hunn. An do wëllt ech just den Här Minister froen, ob en eppes dozou kéint soen. D'Chambre de Commerce huet déi Fro opgeworf, ob een do schonn eng chiffriert Zomm nenne kéint oder ob dat nach ze fréi ass. Op alle Fall ass et e wichteg Schrëtt an déi gutt Richtung. An duerfir e grouse Merci och der Madamm Elvinger fir de gudden Rapport an den Accord vun der grénger Fraktioun zum Schluss.

Merci.

► **M. Fernand Etgen, *Président***.- Iech och e grouse Merci, Madamm Lorsché. Nächste Riedner ass den Här Roy Reding. Här Reding, Dir hutt d'Wuert.

► **M. Roy Reding (*ADR*)**.- Jo, Merci, Här President. Och eis als ADR läit eng gerecht Steierpolitik um Häerz. Gerecht Steierpolitik heescht, datt och d'Gesellschaften esou vill Steiere bezuelen, wéi et richtig a gerecht ass. Mir soen awer och, all Stat sollt esou weéne Steiere wéi méiglech erhiewen, näamlech déi, déi néideg sinn, fir déi wierklech staatlech Aufgabe gutt ze erfüllen - wat net ëmmer de Fall ass -: Gesondheet, Sécherheet, Bildung, Infrastrukturen an esou weider.

An an deem Kontext sollt et eis all, ob privat Leit oder Gesellschaften, um Häerz leien, net méi Steiere bezuelen ze mussen, wéi fir dës staatlech Aufgaben néideg sinn. Mir stëmmen dësen Text.

Merci, Här President.

► **M. Fernand Etgen, *Président***.- Merci, Här Reding. Nächsten ageschriwwene Riedner ass den Här David Wagner. Här Wagner, Dir hutt d'Wuert.

► **M. David Wagner (*déi Lénk*)**.- Merci, Här President. D'Duebelbesteuerungsofkommes oder besser gesot d'Netduebelbesteuerungsofkommes stinn net eréischt säit gëschter an der Kritik, et pour cause. Si sinn en zentraalt Element bei der Strategië vun de Multinationallen, fir esou weéne Steiere wéi méiglech ze bezuelen. An de Schued hunn dobäi natierlech

och d'Entwécklungslänner, well dës Ofkommes meeschtens dat Land bevirdelegen, wou d'Multinationale hire Sëtz huet, an deem entsprechend dat Land benodelegen, wou déi eigentlech ekonomesch Aktivitéit stattfënnt. Besonnesch d'Multinationallen, déi Rohstoffe ausbeuten, profitéieren enorm vun deenen Accorden, fir e Groussdeel vun hire Benefisser onversteiert an déi grouss Finanzzentren vun der nördlecher Hemisphär ze exportéieren.

Dës Ofkommessen droen also zu engem groussen Deel derzou bäi, datt vill méi Sue aus deenen aarme Länner an déi räich Länner fléisst wéi ëmgekéiert an datt d'Inegalitéiten op der Welt weider zouhuelen. Dat hunn och eng ganz Rei vun Etüden, déi vu groussen Entwécklungs-ONGe gemaach goufen, erginn.

Wéi wann déi konkret Ausgestaltung vun deenen Accorden an hir inhärent Logik net scho schlëmm genuch wären, kënnst dann och nach en anere grouse Problem derbäi, dee vum sougenannten „treaty shopping“. Dobäi geet et drëms, datt d'Multinationale konsequent d'Lücken an d'Inkohärenzen ausnotzen, déi sech zwangsleefeg am Zesummespill vun deenen Dausende bilateralen Duebelbesteuerungsofkommessen erginn, Lücken an Inkohärenzen, déi vu verschiddene Länner jo och nach bewosst opgemaach ginn. Andeems d'Multinationale geziilt Filialen a bestëmmte Länner ariichten, déi se dann an hiren Transaktiounen zwëscheschalten, profitéiere se da vun esou Bestëmmungen aus deenen Duebelbesteuerungsofkommessen.

Fir dësem Abus, also deem sougenannten „treaty shopping“, entgéintzewierken, ass um Niveau vun der OCDE dann dat Instrument vun der multilateraler, multinationaler Konvention entwéckelt ginn, iwwert dat mer haut ofstëmmen. Si soll, esou zumindest déi offiziell Narratioun, méiglechst an engem Schlag déi Lücken zoumaachen, déi d'Multinationale systematesch zu hirem Profit ausnotzen.

Datt dat awer an der Praxis net wäert geléngen, ass an eisen Ae vu vira kloer. Well zwar bréngt dës Konventioun tatsächlech eng ganz Rei vu Verbesserungen mat sech, déi mer och ausdrécklech begrëssen, mä si wäert de generelle Problem beschtefalls agrenzen.

Wéi ech schonn e puermol hei op der Tribün gesot hunn, produzéiert de BEPS keng endgültig Léisung fir de Problem vun der Steuerflucht vun de Multinationallen, mä nëmme Plooschtere fir op déi eklatanteste Mëssstänn. An dat ass och de Fall bei dësem Projet. Fir datt déi Konventioun fir esou vill Länner wéi méiglech akzeptabel an op esou vill wéi méiglech Accorden uwendbar ass, hunn d'Länner d'Méiglechkeet, dës Konventioun ganz flexibel unzewennen. Si kënnen eng ganz Wull vun Ausnamen a Reserve formuléieren, déi den Impakt vun der Konventioun dann och deementsprechend verréngern.

Wat als pragmateschen Usaz geduecht ass, bréngt graveierend Nodeeler mat sech, well amplaz an d'Richtung vun engem méi einfachen a méi uniformen internationale Steiersystem ze goen, mat klore an harmoniséierte Regele géint méiglech Abusen, gëtt hei mat all Reserv zousätzlech Komplexitéit a potenziell Konfusioun agebaut, ëmsou méi wéi all Reserv, déi vun engem Land formuléiert gëtt, natierlech och verhënnert, datt dat aner Land, mat deem een en Ofkommes huet, déi entsprechend Regele kann unwennen.

Lëtzebuerg dreift dat natierlech erëm op d'Spëtz an huet esou zimlech de Maximum u Reserven a Flexibilitäten agebaut, déi nëmmen iergendwou méiglech waren.

► **M. Roy Reding (*ADR*)**.- Très bien !

► **M. David Wagner (*déi Lénk*)**.- D'Liesbarkeet ... Ech mengen, do ginn ech wierklech richtig bestätegt doranner.

D'Liesbarkeet vun de Steierbestëmmungen geet ...

(*Brouhaha*)

Jo, mä de Problem ass just, Madamm Lorsché, datt den Här Reding dat gutt fënnt an ech et net gutt fannen. Mä mir sinn eis eens.

(*Hilarité*)

► **M. Roy Reding (*ADR*)**.- Et ass jo da richtig.

► **M. David Wagner (*déi Lénk*)**.- Mä d'Majoritéit ass sech mat der ADR u sech jo och iergendwéi eens.

Well wat maache mer a Wierklechkeet hei? Dat, wat mer den Engländer jo ëmmer virwerfen innerhalb vun der Europäescher Unio, dat wäert elo net méi laang daueren, dat ass dee sougenannten „cherry picking“. A grad bei dëser Konventioun, mat all deene Reserven, déi mer agebaut hunn, bedreiwe mir e regelrechten „cherry picking“. Dat heescht, dat Instrument, wat interessant kéint sinn, wat awer och

schon net esou wäit geet, gëtt vun eis komplett ausgehielet, soss géife mer et vläicht och hei net esou einfach unhuelen. An et gëtt och komplett onliesbar gemaach. Souguer d'Chambre de Commerce seet jo an hirem Avis, datt ee keen Duerchbléck méi huet. An do wäerte sech natierlech och verschidden Audits-firme freeën, fir sech och mat all deene ganz komplexe Regelen, déi mir hei aféieren, kënnen ze beschäftegen.

Wéi gesot, wéi och am Exposé des motifs drasteet, mir hunn eng Virgoensweis, déi ass « en ligne avec la politique conventionnelle actuelle ». Dat heescht, esou e grouse Worf ass dat net.

A vu datt mir mengen, datt justement dee Projet de loi d'Saach wäert verschlimmeren an net verbessern, wäerte mer och dee Projet de loi net unhuelen.

Ech soen lech Merci.

► **M. Fernand Etgen, *Président***.- Merci, Här Wagner. Leschten ageschriwwene Riedner ass den Här Sven Clement. Här Clement, Dir hutt d'Wuert.

► **M. Sven Clement (*Piraten*)**.- Merci, Här President. Léif Kolleeginnen a Kolleegen, et kënnst net allze oft vir, datt ech de Kolleegen, déi hannert mer setzen, muss a ville Saache recht ginn, mä hei huet den David Wagner awer e puer wichteg Punkten erwänt.

Mir hu virduerft oft héieren, wéi wichteg multilateral Konventiounen sinn an Zäiten, an deenen d'Benefisser vun der internationaler Zesummenaarbecht ëmmer méi a Fro gestallt ginn.

Ech wëll dofir hei elo guer net laang op en Atout vun enger internationaler Konventioun agoen. Ech mengen, do si mer prinzipiell gréisstendeels alleguerten domadder averstannen, datt et gutt ass, datt en Accord a Steierfroen fonnt konnt ginn. Dofir huelen ech meng Zäit, fir op e puer Aspekter aus dem Gesetzesprojet anzegoen, déi ech perséinlech an och d'Piraten net esou gutt fannen.

Ze kritiséiere sinn hei virun allem emol d'Commentairen zu den Artikelen vun der multilateraler Konventioun, déi d'Regierung zur Verfügung gestallt huet. An deene meeschte Fäll, an deene Lëtzebuerg sech d'Recht geholl huet, eng Dispositioun oder en Deel dovun net wëlen unzewennen, fënnt een als Erklärung nëmmen e kuerze Saz, dee seet, datt Lëtzebuerg sech d'Recht hält, dës Dispositioun, dës Regel oder dësen Artikel net unzehuelen, well se optionnel war. Wisou? „Ma well ech et kann“, ass hei also d'Devise. A wéi soll een dann nach novollzéien, op wéi enger Basis an en vue vu wéi engen Ziler d'Entscheidung getraff sinn?

E Mangel un Transparenz gëtt et awer net nëmmen hei. Och de Fait, dass et keng Version consolidée vun de betreffen Gesetze gëtt - Punkt, dee jo och den David Wagner ugeschwat huet -, ass e Problem fir de Prinzip vun engem liewerleche Gesetz. Well wann nëmme Leit, déi dofir bezuelt ginn, sech kënnen Zäit huelen, fir e Gesetz nozevollzéien an den Impakt vu Projeten, déi mir heibannen diskutéieren, kënnen verstoen, da maache mer d'Liewe vläicht e bëssen ze komplizéiert.

En vue vun enger net nëmme Simplification administrative, mä enger Simplification législative misst ee sech jo awer d'Fro stellen, ob et net heiansdo besser wär, wa mer géifen higoen an tatsächlech de Clienté vun deem, wat mer heibanne maachen, näamlech alle Biergerinnen a Bierger, an net nëmmen den Auditfirmen, tatsächlech e liewerleche Gesetz géifen zur Verfügung stellen.

Ech hu mer soe gelooss, datt et mat den neien Technologien net onméiglech ass, fir esou en „merge“ vun Texten ze maachen, wéi een dat an der Informatik nennt. Deementsprechend ass hei definitiv e Mangel u gudder politescher Kommunikatioun mat alle Bierger.

Schlussendlech ass och d'Umierkung aus dem Exposé des motifs ganz interessant, dass Lëtzebuerg ëmmer déi Dispositiounen gewielt hätt, déi am beschte bei seng, Zitat, « Politique conventionnelle » gepasst hunn. Dass grad dës Regierung, déi sech jo eigentlech grad onkonventionell a progressiv wëllt ginn, dann hei, wann et ëm Steierfroen geet, drop aléist, datt alles beim Ale bleift, dat ass zumindest e bësse kontradiktöresch.

Et léisst drop schléissen, dass am Beräich vun engem fairen internationale Steierconcours net wierklech vun engem Ëmdenke geschwat gëtt. Mir wäerten dëse Projet de loi nichtsdestotrotz matdroen, well déi Dispositiounen, déi ugeholl ginn, sinn e gudden Ufank. Mir bedauern awer, nach eng Kéier, de Mangel un Transparenz, datt Bierger, déi dësen Text eventuell liese wëllen, deen net esou einfach kënnen novollzéien.

Hei gëllt et also, besser ze ginn. Hei gëllt et, d'Gesetze besser no baussen ze droen, well

soss maache mer dat heite fir bezuelten Auditfirmen an net fir all Biergerinnen a Bierger.

Ech soen lech Merci.

► **M. Fernand Etgen, *Président***.- Merci, Här Clement. D'Regierung huet d'Wuert. Här Finanzminister Pierre Gramegna, et ass un lech.

Prise de position du Gouvernement

► **M. Pierre Gramegna, *Ministre des Finances***.- Här President, Dir Dammen an Dir Härren, ech freeë mech op d'Adoptioun, déi elo wäert geschéien, vun dësem Gesetzestext. Fir d'Éischt dem Joëlle Elvinger als Rapporteur e grouse Merci fir dee schrëftlechen a mëndleche Rapport, deen eis déi komplex Matière hei e bësse versicht, verständlech ze maachen.

Ech wëll fir d'Éischt emol ervirsträichen, dass dat heiten een Element ass vum ganze Paquet, deen d'OCDE fäerdegbruecht huet, dee BEPS heescht - Base Erosion and Profit Shifting. An do ass eng vun deenen innovativste Saachen, déi an deem ganze Paquet dra sinn, d'Méiglechkeet, e Genre automateschen Amendement ze maache vun allen existéierende bilaterale Konventiounen. Dat ass esou eng grouss Erneuerung. Während Joren huet all Mënsch gesot, esou eppes kéint een net maachen.

Et ass och par rapport zum internationalen Droit eng immens Erneuerung, iwwert déi mer eis sollen alleguerten freeën. Wann et dat heiten Instrument net géif ginn, da misst Lëtzebuerg déi iwwer 80 bilateral Konventiounen, déi mer hunn, eenzel mat all deene Länner ëmverhandelen.

Mir hunn et iwwregens misse maachen an de Joren 2009, 2010 an 2011, wou mer en Artikel vun der OCDE-Konventioun hu misse progressiv een nom anere mat all Land änneren, an dann och an dës Chamber kommen, fir déi Amendementer ze ratifizéieren. Also, dat hei ass eng grouss Simplificatioun, dat wëll ech all deenen hei soen, déi e bëssen a Fro gestallt hunn, wat hei geschitt.

Mäin zweete Punkt ass, fir ze soen, Lëtzebuerg ass hei en „first mover“. Mir waren hei mat deenen éischte Länner, deenen éischte 76 Länner, déi dat am Juni 2017 ënnerstrach hunn an ënnerschriwwen hunn. Mir hunn also do net gewaart, dass anerer nozéien. Haut sinn et bal 90 Länner - 87, fir genau ze sinn -, déi et ënnerschriwwen hunn. Mir waren also do bei deenen Éischten. Mir haten hei keng Hesitatiounen.

Mir sinn, wa mer haut, wann Dir haut dat Gesetz hei stëmmt, dat 20. Land op der Welt, wat dat mécht. Kommt, mir sinn houfreg driwwer, dass mer bei den 20 Éischten sinn! Ech hunn och Kriticken héieren, dass mer net wäit genuch ginn. Mä, ech mengen, mir sinn hei bei deenen Éischten!

A wéi vill vun eis alleguerten zu Lëtzebuerg hätte jee gegleeft, nach virun e puer Joer, dass mir bei esou engem Exercice bei deenen Éischten wären?!

Nu ware mer hei effektiv och virsiichteg an ambitiéis zur selwechter Zäit. A welcher Hinsicht ware mer virsiichteg?

Mir hunn nëmmen eng Rëtsch vun Dispositiounen geholl, déi mer „automatesch“ adaptéieren iwwert dëst Instrument. Ech kann lech soen, all déi aner Länner hu genau datselwecht gemaach. Jiddereen huet sech eng Selektioun gemaach vu Saachen, déi een „automatesch“ iwwerhëlt. An herno, wann dat deckungsgläich ass mat engem anere Land, da gëtt dat „automatesch“ amendéiert.

Bedenkt och als Parlamentarier, wat dat heescht! Dir gitt hei en Accord - ech hoffen dat emoll -, dass iwwer 80 Konventiounen, déi Lëtzebuerg ënnerschriwwen huet, automatesch hei geännert ginn. Also, wann dat keng Innovatioun ass, da soen ech näischt méi.

Mä mir si jo, wéi gesot, net déi Eenzeg, déi dat maachen. All déi aner Länner, déi dat ënnerschriwwen hunn, wëllen dat jo och maachen. Mä do ass et awer de Minimum, dass ee virsiichteg ass, wéi een dat mécht, dass een do net e Blankoscheck gëtt an einfach alleguerten d'Mesuren, déi an eisen Traitée wäeren, automatesch ännert. An där Hinsicht ware mer prudent.

Mir hunn awer zwou ganz wichteg Saachen mat u Bord geholl, déi automatesch adaptéiert ginn. Dat eent ass den Abus vun der Utilisatioun vun de Konventiounen, an dat ass eng Notioun, déi ganz modern ass, déi hu mer mat u Bord geholl, an och de Règlement des différends. Ganz weéne Länner hunn dat gemaach.